



## LUUSZÄPF E 2011

Am Silvio Berlusconi sini Gspuusi  
wärde immer jünger, die härzige Schnuusi.  
drum het garantiert – es isch zwar nit ganz cool,  
die näggscht wo'n är het, no dr Nuggi im Muul.

h gmietlig duur d'Stadt mergsch s'het gruusig vyll Schwoc  
gheersch iberall Hauchteutsch, vom Moorge bis z'Oobe.

Mi steert das, und ych bi mit däm nit elai  
zem Glygg stoot im Notfall mi Gwehr no dehai!

Ych ha e neys Handy gschänggt griegt vo mim Schatz,  
das isch ultraglai und kompagg, das spart Blatz.

Doch isch mir mit däm ebbis böös abverhey: t  
bi eme Delifon isch's in's Ohr yyneghey.

Mir sammle fir e guete Zwägg – bisch derby?

Es wird alles bruucht vo Ässware bis Ski.

Bring di Uralt-PC, samt Kabel und Muus,  
denn s'Alter isch glyych, s'kunnt dert eh kaine druus.

Mir dangge rächt härzligg und vergällt's Eych Gott:  
So rette mir s'Militär vor em Banggrott!

Stellsch s'Hirni gärn ab und losch anderi dängge?

Dänggsch au fir di Frau, denn ka sie sich das schängge?  
/erdraisch kai Kritigg und schimpfsch numme voll Wuet?

Findsch's Blyttle am Rhybord au nit e so guet?

Hesch Schwarzni nit gärn und kasch Schwuli nit gsee?  
Denn härzligg willkomme in dr SVP!

Sibzig Millione het d'BAZ emol koschtet,

dr Suter het sie fir nur grad aini boschtet.

Dr Grund fir dä Rugggang: do spiilt no dr Märt,  
sit däm dr Somm dert isch, isch d'BAZ nimm vyll wärt!

Bausch e Minergie-Huus muesch's guet isoliere  
verliersch denn kai Weermi, das duet sich rentiere.

Nur ebbis isch gfeerlig, das isch halt dr Fluech,  
es iiberhitzt gli, hesch dr -minu uff Bsuech!

Ha gläase, d'Schwyzzer hän bim Skirennen gwunne,  
erschte Blatz, zwaite und dritte – s'isch gspunne!

Ych juble voll Fraid, doch dä Draum goot bald hi:  
Y mergg, das isch nur d'Schwyzzer Maischterschaft gsi...

S'het ghaisse d'Schwyz syg'i nit gnuet demokratisch  
die Vorwiirf sinn wiider emol symptomatisch.

Derby kasch bim Wäale d'Näme korrigiere,  
das haisst denn ganz aifach: mir dien panachiere.

Denn deerfsch au ai Name e baar mol kopiere,  
däm sait me entsprächend, mir dien kumuliere.

Als neyi Variante git's zum Ussprobiere  
's mehrfache Ussfyllle, „s'Lumengo-isiere“.

Läschtere, schmingge und d'Gralle poliere

d'Friise lo richte, d'Fassade saniere.

So lauft's jetze immer, mir sinn rächt verschrogge,  
sit in Bärn vier Gritte im Bundesroot hogge!

D'Uelibierpipeline gheert ney konstruiert,

so dass sie ins Grossbasel ibere fiert.

Als diräggti Laitig, s'isch zwor im Grund gsteert:  
ins Rothuus, denn die greeschte Fläsche findsch deert!

Froggt di e Tourischt ebbis, sotsch heeflig syy.

Es isch wäagem Image, das seesch sicher yy.

„Wo iss'n der Morgenstrach?“ het mi ain aakickt,  
do ha'n en ganz „heeflig“ uff Mynchestai gschiggt.

Wär e rächte Schwyzzer isch, wählt SVP!

Dr Blocher het gmaint, är wurd das so gsee.

Us der Situation kenne mir numme schliesse:

Jetz mien mir ihn bald mit: „Heil Blocher“ begriesse



---

Wottsch au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---